

Hipulu Vegenalitini Luhuva Gizo Kimimó

Ómasímo gipalámini agepa ale vávani okago gakó lo limimó

¹ Ómasi eza gozapá agepagutí gakó liaká a vetini kegepa ale vávani okimikago, keza avotegini nene gakó haitopaitolímíni itó gapováa haitopaitolímíni li kimiliki iva iva amóza, ² gamena asú inogo noigo imane gamena nene gipalámini agepa ale vávani okago aí gakó lo utó oko lo limimó. Gipala eza mukí netá matalímíni mututonáa loló oko minative loko lóta vémini zámuzatunú mukí netá ale utó imó. ³ Ómasímíni lapanalámíni gonanalivámíni luhuváa aitoka utó imó neve. Itó Ómasímo minoko aleko itímíni lelegiláa aitoka minokanazo, nenemú ezáa zámuzalaló molo gele minake loaká noi gakó nenémo netá mukí hize lé omiaká noive. Áisi nene lihimate nagamí zelimiaká hozaváa ale asú oake, vozaú vémini agizani lamagaloka voko mitó minoko gizapa oko minamó noive. ⁴ Lá noiike ageló kivilege asú oko minamómámíni lelegilaló nene agelolitini kugulizáini avilegeko iteko mina agulizá alimó neve.

Gipalámo ageló kivilege asú noi gakó

⁵ * Ómasímo gakó makó gipala lo amimó nene ageló makó láa loko lo amesá amive. Makó nene gipala láa loko lo amimóma neve:

* 1:5: Age 2:7; 2 Sam 7:14; 1 Iki 17:13

Géisi nene gipáne noanize,
 nénisi nene itínasa gelémo utó nomuluve.

Itó lá okove:

Nénisi nene amelahina loló oko minatoze.

 Itó áisi nene gipáne minative.

6 * Makó nene minoko ganá gipala amiselekago,
mikasiuka liminogo noigo, gipálámini gakoláa láa
liki luhuva gizinamóma neve:

Ómasímini ageló vegená keza mukitó gupá zi amiki
 agepoka li amitave.

7 * Itó helegaloka ageló vegenakumú láa loko
luhuva gizonoimóma neve:

Ómasímo lokago aí ageló vegenalitini kemetameni
 ale viligokago hepé kemetameni ali luhiaká
 niave.

 Keza gelekelé izegipala loló o kimikago ló gu-
 luma kemetameni ale luhiaká niave.

8 * Lá onoi móza, gipalamú nene láa loko luhuva
gizonoimóma neve:

Ómasi geza geí gonanalivagi siá alévoleláló mi-
 noloko voko minanogane.

 Itó geí zámuzámini hánusaváa ale minanike geí
 gasovaló nene ale hehe loko gizapa oaká
 noane.

9 Geza nene hee loko minoaká netakumú
 giviseaká noive.

 Itó netá golesamú nene gumu helesá amive.

 Nenemú Ómasímo geí Ómasi áisi nene
 gogoliza vizitani netupa hologimikago
 gigivekagini kivilegekane.

10 * Makó nene gipalamú ve makolímo láa loko

* 1:6: Gapo 32:43; Age 97:7

* 1:7: Age 104:4

* 1:8: Age

45:6-7 * 1:10: Age 102:25-27

lonoimóma neve:

Guivahani geza ganatilisí mikasímini guhaiváa
molanimóma neve.

Itó okulumakuka keza nene gigizani luhuva
ma niave.

¹¹ Keza miniki haha inigave. Itó géisi nene mino
alévolé oko minanogo ane.

Kéisi nene luhoaká gó nenéminiki minikanazo,
litaha lanigave.

¹² Lá iki niko, géisi nene gakeko ale molanogo ane.
Lá okako, keza nene haitó kemetameki lilí
inigave.

Lá itamóza, géisi nene noani gemetamenigi
áminalokó minanogo ane.

Itó meleke gamenavaka nene ma asú
aminogo ive.

¹³* Itó Ómasímo gipala láa loko lo amimó neve:

Oko nigizani lamagáneloka minoloko voko noako
gala vega kelémo nupa okugo gigisa lapu-
vauka minanigave

loko gipala lo ami gakó nene ageló makó láa
loko lo amesá amimó nenazo, ¹⁴ ageló mukí keza
sikalahuki netá Ómasímini gelegeleléa nene lugutó
vizeakalímini gihiláa ale lá ituni vegená lilími vatí
itave lokogó kimiseleaká noive, itó Izesú nene
ageló kivilege asú onoive loko gelenoune.

2

Lugutó vizeaká iteko minamó

¹ Gipalámini mogona lá oko noinazo, leza gopa
gapo golesagú gapo veleko vokatune loko gi-
palamú gakó gulunimóma nene goha ale gosohá

* **1:13:** Age 110:1

oko amuza moloko alévolé oko geleko minatune.
² Agelogini kegepagutí gakó Mosé gizamó nenémo gihila zekago, vegenalite agelogini gakóini avutá oaká itó gele ahulokoko pelevesava zeakalímini mogona utó okago nene, lihimavagi nenazo, nenémini ago helegáa lihima mota alikamóma nenazo, ³ lélisi nana oko lugutó vizeaká netá iteko minamó nene gele ahulokuko voko haha itimó neve. Ezáa Guivahanímo ganatilisí ámina lugutó vizeaká gakó lo utó molamó nene kagatatunú gili kolosiki gilina vete li limi limi ago ago, alévolé onoimóma neve. ⁴ Lá onoigo, Ómasímo ezáa haitopaitó alévolé suni itó zámuzalámini netala netá gosohá ale utó moloake keí gakó nene hize lé otake Sikalahutokatí monolímini zámuza ezáa litoka molatoka oko gona molake limimó.

Izesú lugutó vizeakalímini Guivahani noive

⁵ Mikasi alika utó itimómámini gakó nolumó nene Ómasímo ageló keza gizapa itave loko loke-tamó negopa, vegenalita gizapa itave loko lole-tamóma neve. ⁶ * Nenemú nene monó gotolaú ve makolímo Ómasi lo ami gakó lo utó moloko láa loko limóma neve:

Géisi vegená ánenémináa nene nanáinimú gele ke-meaká noane.

Itó ve nenémináatini kagapilamó nanamú áinigoko kelémo vatí oaká ane.

⁷ Nene gamena alínipáisi ageló vegenalitikutí limiki minatave loko lokimikanimóza, netá golivagitunú itó lapanalámini agulizatanú ale akoloketanimó neve.

* 2:6: Age 8:4-6

⁸ Lá okanike netá mukí nene kigisa lapuvauka ale molokane.

Ómasímo netá mukí nene vegenalitini sepéikuka molamó nene gona molamike netá mukí avasavagi lehizeko asú imó. Itína gamena nene mukí netá nene vetini sepéikuka molonoigo ánígosá amune.

⁹ Lá noimóza, Izesuni mogonáa nene ánígoko geleaká nune. Gamena alínipa makó nene ageló vegenalitikutí lemeko minamóza, miluma gilike hilimómave loko lapanaki itó agulizá napagi lehizetamó nene ale akiseake noive. Itó ageló vegenalitikutí lemeko minamó nene Ómasímini nasahilí lelí limitive loko lokago, áisi nene he-leaká netá ekesalímini nene vegená mukitoka lelikumule loko gilimó neve. ¹⁰ Ómasímo netá mukí nenémo aí gelegele minative loko noi ve itó netá mukilímini amelaho loló oko mina vémo mohola gipala mukí nene gonanalivagi lapaná lehizeketatove loko gilimó nene kugutó vizeakalímini Guivahani eza miluma geleoko vo milisegekogó minatane loko Izesuni lotamó nene etokave.

¹¹ Itó kigika alémo mokoná loaká noi ve nemó itó kelémo mokoná lamoláa keza minamó keí améipo hamokó noize, nenemú Izesú nene izegipa nungunamotamóneve loketatove loko gelekago avoza helemive. ¹²* Nenemú Izesú Ómasi lo ami gakoláa lá oko neve:

Neza vegenáne zuha geí mogonamú lo kemekinake monó gele vegenáne zuhatini holúikú nama loko gegepoka litove.

¹³* Itó eza Ómasimú li gakó makó lá okogi neve:

* **2:12:** Age 22:22 * **2:13:** Isa 8:17,18

Neza aikumú gele zageko minanogo uve.

Itó makoki lá oko neve:

Imane nezagi itó Ómasímo izegipala nimimoláagi leza mukitoka noune.

¹⁴ Nenemú Ómasímini izegipala leza nene lugupe mémelagi vegená minoaká nouninazo, Izesú ámináminoko lelí lugupe ale luhamó. Lá imó nene ezáa nohilike heleaká amelahini Satani zámuzá nene apele kulutokago, ¹⁵ heleaká netakumú kehelele vizeakalímo nagá zekago miniki aliki a gamenavámini nagakú mina vegená vínasoketatove loko nenémini imóma neve. ¹⁶ Ámina netá nene ageló kelémo vatí itove loko lá osá amive. Eza Avalahani agapilamó zuhagitana nia vegená lekelémo vatí oaká noive liki monó gotolaú luhuva gizinamóma neve. ¹⁷ Itó Izesú eza lelí guguni gizoaká ve napa nene ageló negopa, kugupe mémelagi vegená kelémo vatí itove loko limimó nenazo, Ómasímini avogisalo eza litokó minoko hoza alévolé oko aleakalímini itó agika hize lemeakalímini loló itive loko, Ómasímo vegená lelí lihimatemú goha izapalo molamitive loko nene agunamotamola lezagi mukí netakú hamó lelegító minatave loko lotonoimóma neve. Gapováa lugáa makó minamimó neve. ¹⁸ Ezáa lelikitana miluma gilike lemekú miliakakú vo holamó nenazo, nenemú vegená lelitoka lemekú moloaká netá nene utó o lemekiko, lelémo vatí itimó neve.

3

Izesuni agulizalímo Moseni avilegeneive

¹ Nenemú Ómasímini apazá vegená nigivénegita, okulumakú netá izá mīlīkī alitave loko sele lo likimimó neneta, lekeza monó gele alévolé oaká nounitímini lole ale ve itó guguni gizo ameká noi ve napa Izesuni ánigi hee liki ánigalo. ² * Ómasímo ámina hoza alitive loko lo molotató áisi nene Mosé nene Ómasímini vegenala zuha gelekelé oketamó nenéminoko Ómasímo litokó minatíminoko Ómasímini hoza alévolé oko minoloko voko ale minamó. ³ Numuni geaká noi vémini agulizalímo genei numunímini agulizá avilegeaká noive. Ámináminoko Izesuni agulizalímo Moseni avilegeko lapanalagi neve. ⁴ Itó numuni ale utó moloaká nene vegenalita geaká netá nemóza, netá mukí ale utó moloaká ve nene Ómasi noive. ⁵ Itó Mosé eza Ómasímini numunigitana lilí iki mina vegenatoka minake Ómasímo litokó gelekelé hoza alévolé oko aleko minake, Ómasímo alika Izesukumú lo utó iti gakokumú gakola lo moloaká imó. ⁶ Lá oko minamóza, Kilistó eza nene gipalámo Ómasímini numunigitana mina vegenatoka gizapa noketake Ómasímo litokó hoza alévolé oko aleaká noive. Numuni nene lélisi nene noune. Itó nene hanuvamukopa, ale vavá oleta netakumú ageva oaká nouni netakumú gele gele mininake mulutegú lamaná nogilinake minoloko vitunimó nene Ómasímini numuni loló oko noune loko litunize.

Ómasímini mino gelekelé oakalagú vo holatuni gakó

* 3:2: Nam 12:7

7 * Isilae vegenalite Ómasímini gakó gili ahuli-ake mino gelekelé oakalagú vi hilamakumú nene Sikalahulímo li gakóma monó gotolaú láa liki giz-inamó nene gele minatunize:

Itína nene lekeza Ómasímini anó lupa gilinitamó nene,

8 mikasi gomopalaló Isilae vegenalite gínikaha iake mesaha ake Ómasi gimivagú milamó nenéminiki likigika hize lí iko minamilo.

9 Avotike keza neneló mekeni 40 oko novigo golivagi netá mukí loló oaká umó nene ániagaká amó nemóza, hokolizá i nimiake giminegú miliaká amóma neve.

10 Neza nenemú mesaha okuke keza gamena gamena gopa napa kagatatunú giliaká ni-amó niaze, itó není gapo ániagi vevesiki ánisísá amamóma neve loko lonoumóma neve.

11 Neza mesaha oketuke keza mino gelekelé oakánegú vi hilaminigave loko alévolé oko lo hukoko lumóma neve.

12 Nigivénegita, lekelitokatí makó likigika anu-paki miniiki monó gili ahuliiki alévolé ve Ómasi lekemegeza amikatave liki gizapa iki minalo.

13-14 Leza ganá apí oko gele seketigí uni gakó nene ale gikitoko alinake anosaló anititunimó nene Kilistoni nasahilí izá moloko ale minuni vegená loló itunimó nenazo, gamena gamena itó game-navatini ha neikoma golesa netalímini gimilegú moloká aleká oaká nenémo lekelitokatí ve makó apikulú alekoko Ómasimú agika hize lí okative liki,

* 3:7: Age 95:7-11

eza agata aliko eza agata aliko iki luhusatini ali alévolé iki minalo.

¹⁵ * Nenemú monó gotolaú gakó makó lá oko nemó nene gele alitunize:

Lekeza itína Ómasímini anó lupa gilinitamó nene
Isilae vegená gínikaha iake mesaha amó
nenéminiki likigika hize lí iko lá amilo.

¹⁶ * Nene hí vegenalite Ómasímini anó lupa gili ahuliake pelesa ziaká amó neve. Mosé ale goí oketago Izipi mikasiukatí a vegenalite lá amóma neve. ¹⁷ Itó hí vegenakumú Ómasímo izapaló molokago melekeni 40 oko vimó neve. Nene golesa netá aliake mikasi gomopalaló hili gesá a vegenakumú nene nenémini imóma neve. ¹⁸ Itó hí vegenakumú mino gelekelé oakánegú vi hilamini-gave loko alévolé oko lo hukoko loko limó neve. Nene gakola gili ahuliake pelesa ziaká a vegená Isilae vegenakumú nene limó neve. ¹⁹ Nenemú lá oko gelenoune. Keza Ómasimú gili alévolé amatímo mino gelekelé oaká apalaloka vi hilaamamó neve.

4

¹ Mino gelekelé oakalagú vi hilatave loko lo mololetonoi gakó nene haha amimó nenazo, nenemú lekelitokatí makolímóhe makolímóhe Isilae vegenakitana oko ámina gapoloka vo legesó okative loko lelegesá ligitize. ² Nene hanuvamú nomive. Ómasímini gakola lamaná Mosé lo kimimó áminagó leza lagataló vo holokave. Itó keza

* **3:15:** Age 95:7-8 * **3:16:** Nam 14:1-35

ámina gakó gelemóza, mukilite kigikagú ali mil-
amago lemeko minamigove loko keitoka hutu-
vago minamó. ³ * Leza monó gele alévolé oko
gelenounimoláate ámina mino gelekelé oakalagú
vo aniteaká noune. Nenemú Ómasímini gakó gili
ahulakumú láa loko limó:

Neza mesaha oketuke keza mino gelekelé
oakánegú vi hilaminigave loko alévolé oko
lo hukoko lumó neve.

Nene mikasímini guhaiváa molake netá mukí loló
o asú onoitotí mino gelekelé oko minake, alika
ámina gakó limó. ⁴ * Ámina mino gelekelé oaká
gamenamú nene Ómasímo netá mukí loló o asú
oake gamena nampa 7 neneló mino gilimó neve
liki luhuva gizina gakó nene monó gotolaú neve.

⁵ * Lá okago, veletoka Isilae vegenakumú nene
keza není mino gelekelé oakánegú vi hilamini-
gave, loko limó.

⁶ Leza Ómasímini mino gelekelé oakakú vo ho-
latuni gapo nene ha neve. Lá onoimóza, gozapá
vo holoakalímini gakó lamaná lo kimi vegená keza
gili ahuliake vi hilaamamó nenazo, ⁷ * nenemú
itína vo holatuni gamena makó moloake, mota lo
lukumu gakó nene alika Tevitini agepagú molok-
ago, láa loko limó:

Lekeza itína nene Ómasímini anó lupa gilinitamó
nene,
likigika hize lí iko minamilo.

⁸ * Zosúa nene mino gelekelé oaká numuni apá

* **4:3:** Age 95:11 * **4:4:** Apí 2:2 * **4:5:** Age 95:11 * **4:7:**
Age 95:7-8 * **4:8:** Gapo 31:7; Zos 22:4

gihiláa ale utó moloketamó nelina, Ómasímo alika haitó mino gelekelé gamenamú lamilinamó nenazo, nenemú Ómasímo haitó mino gelekelé game-namú limó neve loko gelenoune.

⁹ Nenemú láa loko gilitunize: Ómasímini vege-nala zuha lelí mino gelekelé oko minoaká holisi makó ha neve. ¹⁰ * Ómasímo hoza ale asú oake mino gilimó ámina iki vegená makó keza Ómasímo mino gilitó mini milatamó nene hozáini aliliki nivitakutí mini gilikilí iki minamó gelekave.

¹¹ Lá onoimó nenazo, lelitokatí makolímo Ómasímini gakola gili ahulakumú vegená gozapá gínikaha gapo miliki vamó áminaló vokatinazo, Ómasímini mino gelekelé oaká apatoka vo holatune loko amuza molatunize. ¹² Ómasímini gakó gele ahuloakakumú makó láa loko gilitune: Ómasímini gakó nene alévolé oko minoakalímini neve. Itó amuzavagi neve. Itó amitá makó agepáa amegesaloka itó agómualaloka sánevetá nene avilegeko noimokitana nenazo, nenetunú hukomo lemeko lemenigi ligikagi itó helisate mapilihavetegi ómuvagi noko helegeetoaká noive. Lá oake, áminatunú nene Ómasímo ligikámo geleakaláa itó gele laga oakalímini mogona ale utó moloaká noive. ¹³ Itó áisi netá mukí ale utó molamó nenazo, Ómasímini avogisaló nene hí netá asuguná oko minative. Aí avogisaló nene netá mukí halakeko nomive. Itó goní hoza alinogo uni vémini avogisaló nene utó okogó neve.

Izesú lelí guguni gizoaká ve sipisite noive

* **4:10:** Apí 2:2

¹⁴ Lelí guguni gizoaká ve sipisi iteko minamó makó minoletonoi ve Ómasímini gipala Izesú áisi nene okulumakú iteko noive. Neneló minoletonoinazo, monola loaká nounimó nene ale gikitoko ale minatunize. ¹⁵ Itó guguni gizoaká ve sipisite eza gena liviseko láa noigo ángo ámegeletosá amive. Lelitoka lemekú moloaká netá utó oaká noimó ámináminoko aitoka haitopaitolímini utó imóma nemóza, aitoka lihimá hamoláa minamimó neve. ¹⁶ Lá onoimó nenazo, netá makolímohe makolímohe omo lovogisaloka noikoma, áisi nasahilí oletoko agika hize lemeko lelémó vatí itive loko leza nasahilila aleaká siá eza gizapa olímiaká noimómaló lehelele vizemiko anititune.

5

¹ Mikasiuka ve lelitokatí guguni giziaká ve napa napa keza Ómasímini vegenakumule loko Ómasiloka utó i amiiki lihimáikumú agepoka liká netá matá guguni gizi amiká amitave liki kilími etó iaká niave. ² Ve nenémináa kezagi keé lamamó minikanazo, negi nagi gatizá minunike otolova o vunimoláa lelikumú hulu iki milumavate gilitató niave. ³ * Nenemú keza keé lamamómave liki, vegenalitini lihimamú itó kezáini lihimáikumú netá matá guguni gizi amiaká niave. ⁴ * Itó ámina hoza ite minamó nene kezáini kigikagutí gakotó negopa, guguni gizoaká ve napa keza Ómasímo kelémó etó okake ámina hoza nene kigizakú molokave. Ámina hoza amelaho Alonani

* 5:3: Liv 9:7 * 5:4: Gá 18:1

nene gozapá ká emane amunaloka ámináminoko Ómasímo amimóma neve.

⁵* Itó Kilistó eza ámináminoko ezáamú giligo itek-ago guguni gizoaká ve napa loló amimóma neve. Nene Ómasímo láa loko lomikago loló imóma neve: Geza nene gipáne noanize.

Nénisi nene itínasa nene gelémo utó nomuluve.

⁶* Itó gakó makó láa loko lo amimó neve: Géisi nene Melikisetekeni avevezahaló oko guguni gizo ameká ve mino lúaló moloko minanogane.

⁷* Izesú eza mikasiuka mina gamenaló hilinogo noitotí alémo atiginá oaká zámuzagi mina veloka like sele napa like agómulagutí ive nogoza lemek-ago voká sipisi lotamó. Lá okago Ómasímini amakuka lemeko minamómave loko gele amimó.

⁸ Eza Ómasímini gipala minamóza, gopa nene miluma maluma geleloko vitotí Ómasímini gakó gele aleakalímini mogonáa ánigo hee limó. ⁹ Lá oake, guguni gizoaká ve napa loló itikumú vo milisegeko mina ve loló oake aí gakola gili aliaká a vegená mukitoka keí kugutó vizeaká nekisáa nomitímini améipo loló imó nene, ¹⁰ lelí guguni gizo ameká ve sipisi Melikisetekeni avevezahaló minative loko Ómasímo lotató lá imó neve.

Monó ahulikatave loko kagata alimó

¹¹ Nenémini gakó mukí nemóza, lekelisi geleakatini alínipagi minikago, lo likimitove loko gulumó gena okave. ¹²* Lekeza gamena

* **5:5:** Age 2:7 * **5:6:** Age 110:4 * **5:7:** Mat 26:36-46; Mak 14:32-42; Luk 22:39-46 * **5:12:** 1 Koli 3:2

hána monó gililiki iva iva iki minatitegi vegená lugáatini tisá lilí alina, etalinamóza, lekeza monó avogisáa nene goha lo lekemeakató mini milikave. Lekeza likigikámini nosá alévoleláa namitató niave. Hanuva aminikó niki minata lelegitó minikave. ¹³ Aminí niaká nia vegená nene hehe loko minoaká mogona ma gili hee lamanazo, vegená nenémináamú nene namuni niave loko loketatonize. ¹⁴ Nosánetá alévoleláa nene olopa vegenalitini mututoni neve. Kagata kigika koloso lamaná okago, netá golesámini itó lamanalímini mogona gili-liki nivake nenémini mogonáa gili vevesiaká nia vegenalitini mututoni lilí inamó neve.

6

¹ Nenemú nene leza lá okove loko Kilistoni gakó avogisáa apí ikú loakalímini nene molokuko neko, gakó amegesáa loloko itinake loakalímini gapo nene miní amitunize. Monó guhaiváa litaha nene nomilinake, gihila nomi hozalotí ligika emane ale viligoaká itó Ómasimú gele alévolé oaká, ² itó nagamí holoaká gakó haitopaitolímini itó gotóitó ligizani moloko lusa geaká, itó helenosakutí oteaká, itó lihima moloketomo vova vova oaká gakó nanamú goha apí itune. ³ Ómasímo gelekiko, lamaná okikoma, gakó amegesáa makó miní amitunize. ⁴ Nenémini amitunikumú láa liki gililo: Monolímo nene vegená lugáatini kigika alémo hanatokago okulumakutí nosánetá niki gilinamó, itó Sikalahú ali lá inamó, ⁵ itó Ómasímini gakó itó alika utó iti gamenámini alévolé zámuzámini lagaváa gilinamóza, ⁶ Ómasímini vegená nenémináa

keza monéna monó ahulatamó nene, Ómasímini gipala goha zohota zaló apiliiki avoza netá lilí itatamó gilitimó nenazo, kigika goha ali viligikiko kelémo atiginá oakaláa nene ma nomive. ⁷ Mikasi makó nene golinímo gamena gamena zeko minake alémo geha zekago, vegenalite áminaló zuhaina zahaina iaká niago, nosánétáini ale utó molokimiaká noimó nene Ómasímini lusaló nene mikasi amelahitoka gihiláa utó oaká noimóza, ⁸ * ámina mikasiloka liliha gasovagi netakó vizititímo gohogó mikasi loló okikoma usí vizekiko lolímo latitó neve. Mikasimú lumó nene mikasimú negopa, vegenakumú lo moloko noluze, gililo.

⁹ Nigika lekemenou vegenáise, neza gakó láa loko nolumó nene lekeza lapuluva itave loko geleko lamuve. Lukugutó vizimó nenémini gihiláa lekelitoka utó oloko voko minative loko gele seketigí oko noluve. ¹⁰ Ómasi eza ma ale gopa oko lá oko osá amive. Eza hee loko mina ve noinazo, lekeza aikumule liki hozaváa aliake likigika aminatímini gihiláa nene vegenala zuha kilími vatí ake nasahilí ikimiaká amó itó itína nalemó nene ezáa nenemú agatí molaminogo ive.

Ale vavá oleta netakumú ageva oko minatune

¹¹ Lekeza mukitoka hamó lelegitó vávani iki lilí ikiko, lehizeletati netá ale lá itune liki ageva iki lakagatagó minoloko noitiko gamena asú itive loko gelenouve. ¹² Nenémini gihila nene lekeza migelelé amiki vegená lugáate gili alévolé inake itó goselé kepelemigo legesó iki netá matá lo moloketamó ali aliaká nia vegenalite vilina gapoló nene

* 6:8: Apí 3:17-18

kemegesaló miliki iliki vitave loko noluve. 13-14 *
 Nenémini gakola makó lá oko neve: Avalahani
 nene Ómasímo lo hutake nénisi nene lusa goha
 gegetoko goha gegetoko inogo uve. Itó okinake geí
 gagapilamó zuha hize hutilí ogimiká hize hutilí
 ogimiká inogo uve. Loko lo molotake ve makó
 iteko minamómámini agulizató lo hukatove loko
 gilimóza, vitagá oake ezáa agulizató ale alévolé oko
 lo hutamó. 15 Itó Avalahá eza Ómasímo láa loko
 lo molota gakokumú goselé apelemigo legesó oko
 minoloko itikeve loko ámina gakolímini gihila ale
 lá imó. 16 Vegenalita ligizani iteko ve makolímini
 avogisaló ale alévolé oko lo hukoaká gakó nolinake
 lelikutí ite mina vémini agulizató lokuko, pelesa
 zeaká gakó nene utó aminogo ive. 17 Ámináminoko
 Ómasímo eza limitove loko lo mololeta netakumú
 nene Ómasímo genezala ale viligoko haitó gakó
 litihe liki kagata losi gilikatave loko agikatunú
 giligo alévolé okago limó neve. Nenémini mogonáa
 ale utó molatove loko lo moloketa netalímini
 gakolímini amupiló ale alévolé oko lo hukoaká
 gakó nene miní amimó. 18 Lá imó nene eza soza
 saza gakó nomimó mina vémo ale alévolé oko gakó
 lositá limó nene hize oteake amekago nene, aí
 amakuka golisi oko halá guni vegená lezagi nene
 netá matá ale vavá oletamó nenémini gihilamú
 amuza moloko alitune loko gele minatune loko lá
 imó neve. 19 * Ale vavá oleta netakumú logoliza
 vizeko ageva oko nountímo ligikámini lukesavate
 loló oko noiike guguni giziaká ve napate monó
 zavusavegú ímeha gó agikagú itiaká amómáminoko

* 6:13-14: Apí 22:16-17 * 6:19: Liv 16:2

okulumakú Ómasímini avogisalo lelémoke iteaká noive. ²⁰ * Neneloka lelikumule loko ale goí olimiaká ve Izesú áisi nene ale goí o mololetoko voko agikagú vo hola ve Melikisetekeni avevezahaló lelí guguni gizoaká ve loló oake alévolé oko mino lualó moloko minanogo ive.

7

Melikiseteké Ómasímini guguni gizo ameká ve mina gakó

¹ * Melikisetekeni mogonamú lo likimitoze, gililo. Eza nene Saleme numutoka agulizaki ve napa itó Ómasi napámini guguni gizoaká ve minamó. Lá noigo Avalahage kugulizaki ve gala véini kipili gizatotí atiginá niago, Melikisetekege viki gapoló hotu likasike eza Avalahani nónohá zetamó. ² Lá omikago, Avalahá lovagutí vauna netá alekamó nene gatoko gona moloake netá 10 10 minakutí hamopamó nene Melikisetekeni amimó. Itó Melikisetekeni agulizalímini mogona lelí gakokutí nene hee loko minoakalímini agulizaki ve napave. Itó Saleme apalímini agulizaki ve minakeve loko, agulizá makó lelí gakokutí nene hulu Guivahanive loko neve. ³ Melikisetekeni izolahiko amelahiko itó avolage keí kugulizá nene monó gotolaú luhuva gizinamamóma neve. Keí mogonamú vitagá iki iki ali utó milamamó neve. Eza minoko aleko imó nene apí imoláagi minamimó itó hilimoláagi minamimó nenazo, eza

* 6:20: Age 110:4 * 7:1: Apí 14:17-20

Ómasímini gipalagitana minake guguni gizoaká ve miní ameko mino-loko voko minamó nominave.

⁴ Imane gili guni iki gililo. Melikiseteké nene ve napa loló oko noigo, avoteho gihila Avalahá eza ve iteko minamó nenémo lovagutí vauna netá lamanakó gatoko gona moloake netá 10 10 minakutí Melikisetekekeni hamopamó amimó neve.

⁵* Livaini agapilamola lugáa guguni giziaká ve lilí iki mina ve keza Avalahani zuha lilí amó nemóza, kigive kagavegutí netá matáini mukí omolamó 10 10 minakutí hamopamó ali alitave liki li mila gakó ali nupa iki lakutí nene li hukikitiki lámó neve.

⁶ Lá onoi móza, Melikiseteké eza nene Livaini mulusigutí utó ami vémo nene Avalahani netá matala mukí 10 10 minakutí nene hamopamó gopa alimó. Lá noi ke, Ómasímo netá lamaná gimitove loko lo molota ve Avalahani nene nónohá zetamó. ⁷ Itó iti mina vete limi mina vegená nónohá zikimiaká niakumú nene makolímo ma gelemuve loko lamitimó nenazo, nenemú Melikiseteké eza Avalahani avilegeko ve napa minamó neve loko gelenoune. ⁸ Lugaloka nene guguni gizi amiaká nia ve keza miniki hilitamó nenete vegenalitini netá matáini 10 10 nekutí hamopamó aliaká niave. Itó lugaloka ámina netá 10 10 nekutí hamopamó ali ve Melikisetekekumú nene eza hili gakó itó agapilamó zuhatini gakó ma nominazo, eza minoloko voko minoaká noi veve liki luhuva gizinamó gelekave. ⁹⁻¹⁰ Neza gelekugo lá okave. Livai eza avolahini agupeuka ha noigo, Melikisetekeki hotu li lomala niasigo, Avalahani liví nene ale amimó nene Livaini amimó geleneive. Lá ok-

* 7:5: Nam 18:21

ago, Livaí eza vegeatotí henoni 10 10 nekutí netá hamopamó aliaká a vetini avóipo mina vémo Avalahani amatoka minake ámina netá nene Melikisetekeni ale amimó gelekave. Itó Livaiki aí agapilamó zuhagi guguni giziaká ve lilí amó mukitó nenete Melikiseteké mota Livaini avilegekave liki linamó gelekave.

¹¹ Livaini agapilamó zuhatini guguni gizoaká hozámuni gizapaló nene Ómasi eza Mosé lo hukoko li gakó nene Isilae vegeaná kimimóza, ámina guguni giziaká ve keza gapo velemó nenémo vo milisegeko minatuni netá ale utó ilina, alika guguni gizoaká ve makó haitolímini Melikisetekeni avevezahaló nanamú utó iline. Guguni giziaká ve Alonani agapilamó zuha minamó nenete lilími vatí ita lelegitó minaline. Lá onoimóza, Izesú utó oake eza Alonani avevezahaló oko minamive. Eza Melikisetekeni avevezahaló utó imó neve. ¹² Nenémini mogona makó lá oko neve: Guguni gizoaká hoza litaha senisim oko gosohá makó ale utó itove loko lonoimó nenazo, Ómasímini avogisaló vo holoakakumú lo hukoko li gakó ámina iki senisim ikiko, gosohalímini makó utó itive loko lonoimó neve. ¹³ Lo hukoko li gakó nenémo Izesutoka vo alekago, eza guguni giziaká zavusavegú hoza ali ve Livaini agapilamolaloka likita vetini mulusigutí utó amimó. Izesú nene haitó mulusigutí utó imó nene ámina mulusigutí ve makolímo guguni giziaká zavusavegú hoza alesá amimó neve. ¹⁴ Guivahanite eza Livaini zuhagutí negopa, agunala Zutani zuhagutí utó imó neve loko mota gele asú oko gelenoune. Itó Zutani agapilamó zuha keza guguni gizi amiaká hoza

alitakumú nene Mosé gakó makó lonamimóma neve.

Izesú Melikisetekeni avevezahaló utó i gakó

¹⁵ Itó guguni gizoaká ve gosohámámini mog-ona makó lá oko utó okave. Guguni gizoaká ve makó Izesú eza Melikisetekeni avevezahaló utó okave. ¹⁶ Eza guguni gizoaká ve loló imó nene Livaini agapilamó zuhagutí utó inigave liki li hukiki linató negopa, eza alévolé oko minoakalímini zámuzaló guguni gizoaká ve minamó minokave. ¹⁷ * Aikumú nene monó gotolaú nene géisi Melikisetekeni avevezahaló guguni gizoaká ve mino lúaló moloko minanogo ane liki luhuva gizinamóma neve. ¹⁸ Nenemú Mosé lo hukoko li gakó nenémo vo milisegeko minatuni netá ma ale utó oloko vamimó nenazo, helegaloka guguni gizoakalímini gakó gozapá limó nene amuza nomitó gihila makó utó amimole loko ale otopá zimó. ¹⁹ Itó helegaloka nenémini avilegetigí oko guguni gizoaká gosohakutí netá lamanakumú ageva oakalímini gihiláa ale utó molamó nenémo gapo velelimikago, Ómasímini avogisaloka voaká noune.

²⁰ Gosohá guguni gizoaká nenémo Izesutoka utó imó nene Ómasímo ale alévolé oko lo hukotató alévolé zámuzalagi utó o amimó. Goí iki guguni giziaká ve keza Ómasímo ale alévolé oko lo hukoko lamitó guguni giziaká ve lilí iki minamóza, ²¹ * gosohá imane nene Ómasímo ale alévolé oko lo hukotató Izesú eza guguni gizoaká ve gihiláa loló

* 7:17: Age 110:4 * 7:21: Age 110:4

oko noive. Aíluhuva gakó Ómasímo lo amimó nene lá oko neve:

Guivahanímo ale alévolé oko lo hukake géisi guguni gizoaká ve mino lúaló moloko alévolé oko minanogane loko li gakó nene ahulaminogo ive.

²² Mogonáa nenéminoko minokago, Izesú nene lo múnahéaká gakó gihilámini ale alévolé iti ve loló imó neve.

²³ Itó goí iki guguni giziaká ve keza nene hoza miní amiki aliliki nivake hili vivi amó nenazo, ámina hoza agepaló alita ve mukí minamó. ²⁴ Lá inamóza, Izesú alévolé oko minoaká ve minoakeve loko guguni gizati hoza nene miní ameko mino lúaló moloko minanogo ive. ²⁵ Nenemú alévolé oko minoakakú noi vémo nene gamena gamena lelikumule loko Ómasiloka voká loaká noinazo, aikumú gele alévolé unikeve loko Ómasímini avogisalo voaká nouni vegená vatí oko lugutó vizeloko voko minatimó neve.

²⁶ Lelémo guni guni oaká vele Izesú nene lelí guguni gizoaká ve napa noimó nene etokave. Eza apazá keké vizeko minoko lihimá nomimó agika gizopa lo minamó eza golesa netá aliaká a vegenakutí etó oko minake, okulumá avilege asú oko nomina ve nenémináámo hoza lá oko aleaká noimó nene etokave. ²⁷ * Áisi nene guguni giziaká ve napa litahagitana nomive. Keza gamena gamena ganá kezáini lihimáinimú ganatilisí guguni gizi amiake alika vegenalitini lihimáinimú giziaká niamóza, hoza nenémináa aliti mogona Izesú nene lihimavagi minamikumule

* 7:27: Liv 9:7

loko nomimó. Eza agika agupeva nene lehize-take guguni hamó nene gizo amekago voko asú imó. ²⁸ Mosé lo hukoko li gakotó nene vegená kigikámo gopa i vegená nene guguni giziaká ve minatave loko gopa loketamóza, Mosé lo hukoko li gakó amupiló nene Ómasímo ale alévolé oko lo hukoaká gakó nenémo gipala alémo etó okago, áisi nene guguni gizoaká ve minoloko voko mino lúaló moloko minatikumú vo milisegeko minamó neve.

8

Izesú lo múnaheaká gakó gosohalímini guguni gizoaká ve noive

¹ * Gakó nolumó nenémini gotola ale nupa oko lá oko neve. Lelí guguni gizoaká ve napa eza veletoka okulumakú Ómasímini golivagi holomaló amakuka agizani lamagaloka voko noive. ² Eza apazá zagusave itó monó seli numuni gihiláa nenegú lelikumú Ómasiloka loaká noimó nenémo guguni gizoaká hoza loló okave. Ámina zagusave gihilama nene mikasi gomopalaló monó seli numuni vegenalite gemokopa, Guivahani ezáa ale utó imó. ³ Guguni gizi amiaká ve napa mukitoka keza iza goula nosá gizi vatá iaká itave liki kilími etó amó nenazo, nenemú lelí guguni gizo ameaká ve Izesú ezagi Ómasi guguni gizo amitive loko lonoi ve minamó. ⁴ Itó mikasiuka Mosé lo hukoko li gakotó Livaini mulusigutí guguni giziaká ve nene hanuva niamó nenazo, Izesú eza keí mulusigutí utó amimó nenazo, eza itínasa mikasigú minamó nelina, lihimatemú guguni gizoaká ve

* 8:1: Age 110:1

minamiline. ⁵ * Keza monó numukú hoza aliaká niamó nene hanuva avevezaha neve. Gihiláa nene okulumakuka neve. Nenémini gakola makó nene monó gotolaú lá oko neve: Mosé eza monó seli numuni gitove loko noigo, Ómasímo láa loko lo amimó: Gelenape. Agokaló noako ametamenía gelepizumó nenemáminoko netá mukí loló ozo loko lotamó. ⁶ Gosohá lo múnahi gakó iteko nemó nene ezáa gosohá lo mola gakó iteko nemó nenémo guhaiváa loló omikago ale utó molamó nenazo, ámina seli numuni gitikumú láa loko lotamóza, imane nene Izesú eza Ómasigi vegenaki kelémo apizitove loko lo múnahi gakó gosohá nenémo iteko nene neve. Áminámini oko guguni gizoaká hoza ezáa aleaká noimó nenémo iteko mukí guguni giziaká vetini hozanini kivilegekave.

⁷ Gozapá lo múnahi gakó minamó nenémo vihelé lo minamó nelina, alika makó utó itive loko gakoláa utó amiline. ⁸ * Lá onóimóza, Ómasi áisi nene Zuta vegenakumú gele golesa oake, lo múnahi gakó gosohakumú láa loko limó nene monó gotolaú láa liki luhuva gizinamóma neve:

Minoko gamena makotó nene Isilae vegenaki itó
Zuta vegenaki lo múnahéaká gakó gosohá
makó ale utó oketatove loko Guivahanímo
loko limó neve.

⁹ Gosohá nenémo gozapá avóike Izipi mikasiukatí kelémoko atove loko kigizató alu gamena kezagi lo múnahéaká gakó moloketu gakokitana nomive.

* 8:5: Gá 25:40 * 8:8: Zel 31:31-34

Keza lo múnahéaká gakó litaha nenémini agikagú ali hehe liki minamago, nénisi ángo ahu-loketumó neve.

¹⁰ Itó alika Isilae vegenaki láa loko gakó lo múnahinogo uve:

Neza lo hukoaká gakónéa kagatagú molokugo liminogo ive.

Lá okoko kigikagú luhuva gizokugo minatize.

Neza Ómasinini minatoze.

Itó keza vegenáne zuha minataze.

¹¹ Lá okiko ámemena niamó itó iti minamó muki keza

nenikumú gili asú iki gilitamó nenazo,

nenemú ve makolímo agivelahinihe itó ahalulahinihe

geza litá oko Guivahanímini mogonáa gele hee lozo loko monó lo ameko lainim-otaminogo ive.

¹² Lá okomú gilinigave: Neza nigika hize kiminake golesa netáini ahuloketanogo uve.

Itó lihimáinimú goha nagata ma gelemínogo uve loko Guivahanímo lokave.

¹³ Itó Guivahani eza lo múnahéaká gakó gosohalímini gako láa láa loko like, gozapá minamó nene mota litaha lokave loko limó neve. Itó netá litaha hulupa lo vi netalímo haha ititó neve.

9

Litaha seli numunima monó numuni makó gihiláámini avevezahaló minamó

¹ Lo múnahéaká gakó litahagú nene Guivahanímini avogisalo gupá ze ameká gakó minamó, itó imane mikasiuka monó seli numuni gemó ²*

* 9:2: Gá 26:1-30, 25:31-40

nenémini gakola lá oko minamó: Ámina seli numukú nene sahaa makó hizi hukamó makó avogisaló minamó, agulizá apazale liki lamó, nenegú nene lamu ló hána itó holoma agisavagi minamó, itó holoma amupiló nene Ómasímini avogisaló milina peleti nene minamó. ³ * Itó voko agika makó ímeha gotunú hizi hukamó minamó, agulizá apazá gihiláa etole loko minamó. ⁴ * Nenegú nene anuvagi paulá guguni gizoaká holoma makó golitunú lilí amó nene minamó. Itó golitunú hitina pokisi nene lo múnahéaká gakolímini pokisi minamó. Áminagú laisigitana netá agulizá mana nosalímini somo nene golitunú lilí inamóma nene minamó. Itó Alonani hánusa sisiváagi nene minamó. Itó gatapa gehani losiló nene gapo lota gakó luhuva gizokago minamó. ⁵ * Veletó nene Ómasímini lapanalímini avevezaha netá kogokénagi netá ageló nenéminoko lositá keza pokisimámini amupiló lihma gilatoakakumú golani hepa hepa iaká ató nene kogokénatunú ali hitikasike minasimó. Nenémini gakola hána okative loko miní ameko lo asú amitove.

⁶ * Netá nenéminiki milikago, nego, numuni avogisa nenegú nene guguni giziaaká a ve keza gamena gamena itiki hozanini aliki miniaká amóza, ⁷ * apazá gihiláa etole loko mina numuni agikagú nene guguni giziaaká vetini ve napa ezáagó melekeni makolímini agikagú nene gamena hamó zupa iteaká imó. Lá oake meme

* **9:3:** Gá 26:31-33

* **9:4:** Gá 30:1-6, 25:10-16, 16:33; Nam

17:8-10; Gapo 10:3-5

* **9:5:** Gá 25:18-22

* **9:6:** Nam 18:2-6

* **9:7:** Liv 16:2-34

izatini itó pulumaká izatini golani aleneikegó itike ezáa lihimá itó vegenalitini lihimáini gopa alinamó nenemule loko lihimá gilatoaká holomaló golanima hepa hepa imó. ⁸ Ámina netalímini mogonamú nene Sikalahulímo láa loko lo nolimive: Seli numuni nene ha neiko apazá gihila etó onoi zavusavegú Ómasímini avogisalo vo holatuni gapo koló o gesá amimó neve. ⁹ Itó ámina seli numuni minamó nenémo imane gamenaló Izesú loló oaká noi netalímini avevezahaváa neve. Nene ániigokinake nene apazá seli numukú iza goulda nosá guguni gizi vatá iaká nenémo Ómasímini monó lituni vegená ligikagú vihelé lo miniko minatuni netá ale utó amitimó neve loko gilitune. ¹⁰ Nenémo lugupeloka li mila gakó nenegó neve. Itó zahí nagamí itó lugupe nagamí zeaká nenémini gakoláa neve. Nene Ómasímini gakotó utó okago, vegenalite ámegetiliki viki niko alika Kilistó lo múnaheaká gakó gosohá utó itive loko lo hukuletamó neve.

¹¹ Lá onomóza, Kilistó áisi nene netá gihiláa ale utó inogo molamó nenémini guguni gizoaká ve napa utó imó. Lá oake seli numuni haitolímini nene vo milisegeko minamó itó gihiláa lamaná minamó itó kigizanitunú gemamó itó imane mikasiuka nomimó nenegú itimó nene ¹² eza memegi pulumakalitinigi golani negopa, ezáa golaníagi apazá etó oko mina apakú gamena hamó itike meinavate hizeko gologí oletati gapo vilimó nenémo alévolé oko mino lúaló moloko minanogo ive. ¹³ * Memegi pulumakalitinigi

* **9:13:** Liv 16:15-16; Nam 19:9,17-19

golani itó pulumaká akalevámíni lanía nene golotuva mogona alina vegenatoka hepa hepa iake kugupeloka holokimikago, vihelé igo minamó. ¹⁴ Lá okanazo, Kilistó eza nene minoloko vova vova oaká Sikalahulímo hize lé otago, ezáa agika agupe avasavagi minamó nene Ómasi lehizemiake, lélisi oko moloko oaká uhá netá hutuváa ligikagú gímizimó nene Kilistoni golanímo aleko iteko nagamí zeko lelémo vávani okiko, alévolé Ómasi gelekeleláa otanogo une.

¹⁵ Nenemú nene Kilistó eza lá oake, lo múnahéaká gakó litaha nenémini gizapaló minunike lihma ale utó mulunikutí akagá oletatove loko hilimó neve. Lá okamó nenazo, Ómasímo sele lo kimi vegená keza alévolé oko minoaká helisa henoni alitave loko lo moloketamó nene ali lá itave loko Ómasigi vegenaki kelémo apizeakakumú lo múnahi gakó gosohá ale utó mololimikave.

¹⁶ Helisa henonímini gapováa lá oko neve. Izegipatini améipo hilimómámini mogona utó o lamaná okagogó helisa henoni alita gapo koló itive. ¹⁷ Gosohá agómulagi noiko, helisa netalímini gakó nene hanuvagó minanogo ive. Helekiko, améipini netá matakumú luhuva gizina gakó nene gihila zekiko, helisa henonima gona miliki alinigave. ¹⁸ Nenemú ámináminoko lo múnahéaká gakó litaha nenémo pulumaká ahe memetini golani lepikagogó vo alimóma neve. ¹⁹ * Nenémini mogona lá oko neve: Mosé eza lo hukoko li gakó luhuva gizamó nenémini gakola lo keme asú oake,

* **9:19:** Gá 24:6-8

pulumaká izatini itó meme izatini golani nene nagamiki ale gopa oake, sagelegelegitana netató nene meme izámini zopova golohatunú molo likeake, nenetunú nene ahipí zeake, lo hukoko li gakolímini pepaló itó vegenatoka hepa hepa imó.

²⁰ Lá noike, Ómasímo lo múnaheakalímini gakó lo hukoleketamó nene golani imanémo ale alévolé oko minative loko lo kimimó. ²¹ * Mosé nene monó seli numuni nemó itó apazá hozámini netá matá nemó nene lá oko ahipí zeto asú imó. ²² * Itó lamaná Mosé lo hukoko li gakotó netá mukí otigí nene memetini itó pulumakalitini golanitunú ale guluví loaká noimó neve. Golani lepinamató nene lihima gilatoakaláa ma nomive.

Lihimate Kilistoni amupiló itekago agohí geake Ómasi guguni gizo amike hilimó

²³ Netá matá gihila okulumakú nemó nenémini avevezahaváa nene gaha-namatini golanitunú nenéminiki nagamí ziki ali guluvitatave loko lonoimó nemóza, okulumakú iteakalímini gapo gihila nene guguni gizoakalímini etó oko haitolíminitunú nagamí zeko ale mokoná lative loko lonoimóma neve. ²⁴ Nenemú nene Kilistó eza apazá zavusave kigizanitunú gemó itó netá gihilámini avevezaha minamó nenegú nene vo holonamive. Eza okulumakú iteake Ómasímini avogisaló lelikumule loko hize lé oletati hoza nene aleaká noive. ²⁵ Zuta vetini guguni gizia ká vetini ve napa áisi meleketó meleketó gamena hamokó zupa apazá numukú voaká noive. Lá noike, ezáa golaníatunukopa, hanuva netalímini

* 9:21: Liv 8:15 * 9:22: Liv 17:11

golanía aleake iteaká imóza, Kilistó eza agika agupéa gamena gamena ahuloletamó nelina, eza mikasímini guhaiváa utó itotí emane heleloko ova ova oko komasí minamiline. ²⁶ Lá onoimó nenazo, Kilistó ezáa agika agupéa nene lelikumule loko ahulanogo gamena mukí itemimóma neve. Áisi nene Ómasímo mola gamena asú inogo noigo gamena hamokó ezáa agika agupéa nahuliko, lihimate asú itive loko utó imó nene asú o lamaná okave. ²⁷ Vegenalita gamena hamokó hilitune loko itó alikáa lihimatemú goní inogo une. ²⁸ * Ámina oko Kilistó eza mukí vegenalitini lihimaváini aí amupiló itekago, agohí geake Ómasi guguni gizo amike hilimó. Itó lihimate asú itive loko negopa, eza kogoliza viziki ageva iki miniaká nia vegená kugutó vizeaká hoza ale lutigitove loko alika goha utó inogo ive.

10

¹ Mosé lo hukoko li gakó nene makó gihiláa alika utó ititímini avevezahaváa neve. Gihila lamaná nomive. Nenemú guguni giziaká ve napa keza Mosé lo hukoko li gakotó kilisimasiló kilisimasiló guguni áminámini ikigó giziaká niamó nenémo Ómasímini avogisaló viaká nia vegená nene monéna vo milisegeko minoaká gapo velesá ale utó amimóma neve. ² Ómasi gupá zi amiaká nia vegená nene monéna kigika ale gizopa loketamó nelina, ligikagú lihimate nomimó nominune liake guguni gizoaká nene ahulaline. ³⁻⁴ Lá onoimóza, guguni gizoakakú memetini itó pulumakalitini

* **9:28:** Isa 53:12

golani lekemó nenémo lihimaváini asú oakaláa ma nominazo, guguni gizoaká nene kilisimasiló kilisimasiló nigizago, lihimaváinimú goha giliaká niave.

⁵* Nenemú nene Kilistó mikasigú limitove loko noike ezáa agupe guguni gizatikumú nene amelahini lo ami gakó nene monó gotolaú láa liki gizinamóma neve:

Guguni gizo gemeaká nene haitopaitolíminimú gumu helemive.

Lá okaninazo, nugupe ale vavá onetanimó neve.

⁶ Haitopaitó izatunú apiliki saga liki guguni giziaká amó nene ánigo lamaná osá amane. Lihimavate asú itive loko guguni gizoakakumú ma gelesá amane.

⁷ Lá okago, láa loko lumó: Gelenape. Ómasi geza litanitoka molatanitoka itove loko nouve. Lo hukoko li gakolímini luhuvagú není gakó gizonoitó alitove loko nouve.

⁸ Iza guguni gizo gemeaká haitopaitolíminimú gelesá amane loko, itó haitopaitó izatunú apiliki gé liake lihimavate asú itive liki guguni giziaká niamó nene ánigo lamaná osá amanimó neve loko limó nene, ámina guguni gizoaká hoza nene Mosé lo hukoko li gakotokó giziaká akumú limóza,

⁹ némika loake Izesú miní ameko láa loko limó: Ómasi geza litanitoka molatanitoka itove loko nouve loko limó nenazo, lihimate asú iti gapo litaha nene ale otopá zeake, gapo gosohalímini nene ale utó imó. ¹⁰ Nenemú Ómasímini gakotó Izesu Kilistoni agupe nenémo guguni gizokago,

* **10:5:** Age 40:6-8

leza mukitoka ligika ale guluvitokago nounimó nene goha aleminogo ive. Mota alekago monéna asú onoive.

Kilistó ezáa golanitunú guguni hamó gizokago asú okave

¹¹* Zuta vetini guguni giziaaká ve mukitoka keza gamena gamena hozanini aliki oti minake guguni giziva giziva iki miniaká niamóza, nenémo nene vegenalitini lihimáini gilatoketosá amive. ¹²* Lá onoimóza, Kilistó nene lihimate asú itive loko ezáa golanitunú guguni gizokago, asú okamó nenazo, nenémini amupiló goha lá aminogo ive. Itó lá oake, Ómasímini agizani lamagaloka mitó minamó. ¹³ Neneló Ómasímo gala veva agisa lapuvauka kelémo molatikumú ageva noive. ¹⁴ Ligika avasavagi lelémo etó oaká gapoló voaká nouhá vegená nene guguni hamó gizoake, lelémo vo milisegeko minatuni gapoló molokago, lutegekamóma neve.

¹⁵ Itó Ómasímini Sikalahulímo ezagi ámina gakó nene lamaná gihila neve loko lo utó oko lo lemekamóma neve. Aí gakola monó gotolaú lá oko neve:

¹⁶* Alika gamenaló lo múnahéaká gakó lá oko ale utó moloketatove loko Guivahanímo láa loko nolive: Neza nene lo hukoko lu gakó nene kigikagú molokimikugo, lemekago, kagatagú luhuva gizokugo minatimó neve.

¹⁷* Loko loake, áminaló miní ameko láa loko live:

* **10:11:** Gá 29:38 * **10:12:** Age 110:1 * **10:16:** Zel 31:33

* **10:17:** Zel 31:34

Golesa netáinimú itó lihimáinimú goha gelemínogo uve.

¹⁸ Nenemú lihimate mota ahulonoitó nene netá golesamú guguni gizoaká nene áminagó oko asú o lamaná okave.

Ómasímini avogisaló anitinake monó ale gikitoko ale minatune

¹⁹ Nenemú nigivénegita, Izesuni golani nenémo gahe segelimikago, leza Ómasímo apazá minoaká noitoka ititunikumú ligika nene vávani oaká noive. ²⁰ Monó zavusavegú ímeha gó nene aí agupémini avevezaha minamó nenazo, nenémo zeko hoú lo losi noigo Ómasímini amatoka voakalímini gapo gosohalímini itó alévolé oko minoakalímini ezáa ale koló oletamó nenazo, ²¹ itó eza iteko voake, guguni gizoaká vele napa loló oake, Ómasímini vegenala zuha lelí gototeló gizapa ve noinazo, ²² * nenemú eza gele alévolé unitímo ligika vávani onoiko, soza ligikagi minaminake, itó lihimategi nominuko gena livisi netá nene aí golanitunú holomikago, ligika vávani ominiko, itó lugupe nene nagamí agómula ominatitunú nagamí zelimikiko noinake Ómasímini avogisaló anititune. ²³ Lá noinake, leza gakó lo molató amegesaló moloaká ve noinazo, ageva nouni netá nene lagata losi pasi amoko ale gikitoko gizapa oko minatunize. ²⁴ Itó ligikatunú nasahilí oko ligika eza amiko eza amiko inake, netá gihila loló oakakumú eza alémo vatí iko eza alémo vatí iko oko minatune loko ligika ale vávani oaká gapomú vitagá oko minatune. ²⁵ Lá inake,

* **10:22:** Liv 8:30; Izi 36:25

monokumú alegesá oakakú vegená lugáate isá amake amanapa iki miniaká niamó nenémini aminake, eza ale kii lotiko eza ale kii lotiko itunize. Guivahani ati gamena mota alitokanazo loko gele mininake amuza moloko nenémini itunize.

²⁶ Nenémini amitunikumú láa liki gililo: Leza Ómasímini gakó gihiláa nenémo ligika hize hanatokiko, golesa netá nene goha lagata geleko alémo etó oko ale minukoma, lihimate asú itive loko guguni gizoakaláa makó ma nomive. ²⁷ * Nenegopa nenémini lihimaváa golivagi napa ló agénahunámini lehelele viziko ageva minanogo une. Ló guluma nenémo Ómasi lova ali amiaká nia vegená nene akohú kipilinogo ive. ²⁸ * Ve makolímo Mosé lo hukoko li gakó avutá okago, ve losive makolehe itó lositakó ahe aí gakola likago, aí mogona golesa utó okago, miluma gilitamake litá iki apili hiliaká niave. ²⁹ * Nenémo genavagi otigí oko nemóza, ve makolímohe makolímohe Ómasímini gipala ale mumusopa zitimó, itó apizeko múnaheakalímini gakó gosohá ale alévolé oaká golani lepimó nenémo agika ale mokoná lamó nenemú ánigo ha gele gele itimó, itó nasahilí olimiaká Sikalahuni nene aleko letatimó nene, Ómasímo nana otatimó neve. Eza goní napa genavagi inogo ive. ³⁰ * Gilinahe. Lihima kemeaká nene není hozámini ago helegáa neve, itó apasoaká nene nezáne inogo uve loko li vemú gelenoune. Itó Guivahani eza vegenala zuha keitoka gakó hoza aleko gona moloketanogo ive

* **10:27:** Isa 26:11 * **10:28:** Gapo 17:6, 19:15 * **10:29:** Gá 24:8 * **10:30:** Gapo 32:35-36

loko li vémini mogona geleaká nouhá nenazo, litaha gapoló atiginá oko vitunikumú goní aminogo une loko litupe. Íi. ³¹ Gamena napaló alévolé oko minoaká Ómasímini agizakú holoaká nene genavagi netá nekumule loko noluve.

³² Lekeza gozapá Kilistoni gakó ganá gelekumú goha gililo. Gamena nene zupa likigikagú nene Ómasímini liví nenémo hize hanatolikimikago, miluma malumámini agikagú minake Izesukumú génopa hoza aliki alévolé iki minamó. ³³ Itó lekeza miluma netalímo lukumupiló itekago, gopoguni mililitake lokovoza hiliti netá lilí ilikitinamó. Itó gamena makó lekeza nene likigive lakagave netá nenémináa lilí nikitago lekezagi miní amiki miluma gilikitamó. ³⁴ Likigive lakagave nene monokumule liki nagá numukú ahulikimikago, keikumule liki mulutini gitihiná imóma neve. Itó monóini nomi vegenalite henokanotini ipá i alikago nene, likigikámini henoni lamanaláa alévolé oko mino-loko voakalímini okulumakuka molo-nounne liki giliake, lokogoliza viziaká amóma neve.

³⁵ Lá iki minamó nenazo, itína nene Ómasimú gele zageakatini ahulamilo. Nenémo minoko alika meinava napa ale utó oleketanogo ive. ³⁶ Ómasímo lititoka molatitoka oko moloko inake netá ale vavá oleketamó nenémini gihiláa alika alitune liki lekeza genavagi netalímini agikagú hulu iki minalo. ³⁷ * Izesú lelí hozámini meinaváa liminogo goha atikumú monó gotolaú luhuva makó láa liki gizinave:

Gamena alínipa makó neve. Nene asú noigo anogo

* **10:37:** Hip 2:3-4

ize.

Ative liki lina ve nene mino otoha amoko litá oko anitinogo ive.

³⁸ Lihimáini nomi vegenáne nenete gili alévolé atímo alévolé iki miniki aliki inigave.

Itó makó keza ahuliiki atiginá iki vitamó nene keikumú gelekugo laga niviseminogo ive

loko Guivahanímo limó neve. ³⁹ Itó leza keé lamunike goselekaselé oko monó ahulunike lapuluva oaká gapómini mututoni noamune. Lélisi nene Izesunimú gele alévolé okunike lemeni lugutó vizeakalímini mututonáa noune.

11

Ómasimú gele alévolé oakalímini mogonáa

¹ Ómasimú gele alévolé oakalímini mogonáa lá oko neve: Netá matakumú lagata losi gelemoko ageva oaká nounimó nene alitune loko gele seketigí o minatune, itó áinigamuni netakumú ageva oaká nounimó nene ale ligizakú itune loko gele hamokó itune. ² Avotege lugáa gozapá miniki aliki amó nenete Ómasimú gili alévolé iki miniaká amó nene Ómasímo áinigokago lamaná oaká imó. ³ * Gozapá nene Ómasímini gakotó mikasiuka netaki okulumakú netaki ángoaká nouni netá nene ánigamosalagutí utó imó neve loko gele alévolé unikeve loko gele hee loko gelenoune.

⁴ * Atani gipala Epoló gele alévolé oakala minakeve loko Ómasi guguni gizo amimó nene Ómasímo áinigokago, lamaná okago, uvolaho Kaini

* **11:3:** Apí 1:1; Age 33:6; Zon 1:3 * **11:4:** Apí 4:3-10

nene ánigo goselé imó. Epoló gele alévolé oakala nene Ómasímo ánikokago lihimala minami ve minake, guguni gizo amekago alimómámini mogona neneló ale molamó. Itó Epoló helekamóza, gopa gele alévolé oko mina gakó imane lo lemeaká noimó gelekave. ⁵ * Enokú eza gele alévolé oaká ve minamole loko Ómasi eza ánigo lamaná oake heleká nene aitoka utó amitive loko gosohá agómulagi okulumakú alémoko itimó. Lá omikago vegenalite aikumú vitagá amó. Itó velesá itenamigo aí mogonamú nene Ómasímo Enokuni ánigo laga imó neve loko utó onoimóma neve. ⁶ Nenemú láa loko gilitunize: Ómasi eza noive loko itó aí mogonamú amuza moloko vitagá ituni vegená nene meinava limitive loko ligikatunú gele seketigí okogó aí amatoka voakaláa nenazo, gele alévolé oakate minamitimó minokukoma, Ómasímo ániगतimó ma ánigo lamaná amitimó neve.

⁷ * Noá eza gele alévolé oaká ve minamómave loko Ómasímo alika ale utó iti netá velesá ániगamigo, goí oko gakó agata aleko lo amekago, Noá nene Ómasimú goliva gilike vegenala zuhagi gosohá minatave loko nene loake, nagamikú lape sipisi loló imó. Lá noiike, mikasiuka vegenalitini lihimáinimú goní ita mogonamú lo utó oake, lihima asú omikago minoakalímini gihiláa Ómasimú gele alévolé unikeve loko aleaká unitímini gihiláa nene ale utó imó.

⁸ * Ómasímo mikasi makó geí helisa henoni

* 11:5: Apí 5:21-24 * 11:7: Apí 6:13-22 * 11:8: Apí 12:1-5

minative loko lehizegetatoze, geza mikasiga ahulokoko makotoka voko minatane loko Avalahani lo amekago, Ómasimú gele alévolé oakeve loko gele aleake mikasi nenemupe nenemupe limó nene gelemike, gele gopa oake gopa vimó. ⁹ * Gele alévolé oaká ve minoakeve loko mikasi ánigo molotamó neneló vike aniteake, gutá minake, seli numuni moloake minake, ánuvanegú ako minamó. Gipala Isaká itó aí gipala Zakopó keza ámina lo moloketa netá ali lá itái ve minasike ámináminiki seli numukú miniaká asimó. ¹⁰ Avalahá eza alévolé lukesavagi apá makó utó itive loko Ómasímo vogunahana moloake ale utó mola apakumú ageva oko minamó. ¹¹ * Venala Salá eza gohuna vená noiike, Ómasimú gele alévolé oakalímini minoakeve loko gelehosi moloake izegipala getati gamena asú okago, zámuzá amekago, izegipa agatupagi minamó. Ómasímo nene agómulaló lo molomikago gihila zeaká noi vemámo lo utó molokave loko gele seketigí oake nenémini imó. ¹² * Itó nenemú nene hele vegenakitana mina ve hamokutí hize hutilí oakalímini zámuzáa asú oakakú agapilamó zuha hizi hutilí amó keza okulumatoka sonohí minoloko voko oko noimó nenémini avevezahaló, itó age nagamí agataló emane getani nemó nenéminoko vegenalita gatoko gato asú amoakalímini avevezahaló utó iliki vamó.

¹³ * Ámina vegená mukitoka Ómasimú gili alévolé iki minake miniki hili vamó keza ale vavá oketa

* **11:9:** Apí 35:27 * **11:11:** Apí 18:11-14, 21:2 * **11:12:** Apí 15:5, 22:17, 32:12 * **11:13:** Apí 23:4; 1 Iki 29:15; Age 39:12

netalímini gihila nene velesá alemake, hanuva hotó nego ániagiake, kogoliza viziki ali kamatoka milamó. Lá iki minake, leza mikasiuka hanuva veno ve gutá noune liki gelemó. ¹⁴ Gakó némika liki liaká nia vegenalite gotó apáini gihila makó ali utó milanigi kigikagú giliki minamómámini mogona mota utó okave. ¹⁵ Lá iake, keza numuni apáini itó mikasinini ahulakumú miluma makó giliki lá amamó. Ámina apakumú kivisekago nelina, atiginá iki anigi hanuva aline. ¹⁶ Lá onoimóza, keza nene numuni apáini lamanaláa makó alinigi nenemukó gelemó nene okulumá apakumú gelemó neve. Ómasimú nene Ómasile liki likago, gelekago agoliza napa vizekave. Nene ezáa numuni apá makó okulumakú ale utó moloketakumú geleleneike agoliza vizekave loko gelenoune.

¹⁷ * Itó Avalahá eza Ómasímo amekú mola gamena nene gele alévolé oaká ve minoakeve loko gipala Isakani apeleko gizatove loko gele vávani imó. Ezáa agapilamó zuha hizi hutilí itave loko Ómasímo lo molota gakó nene ale ali ve minamóza, gipala hamó nene apeleko gizatove loko gele hamó imó. ¹⁸ * Isakatokatí hizi hutilí itamoláamú gagapilamola gihila minanigave loko lota gipala minamóza, ámina gipa nene apeleko Ómasi guguni gizo amitove loko gilimó. ¹⁹ Avalahá eza Isakakumú láa loko gilimó netive: Ómasímo eza Isakani heleneikutí alémo otitove loko nenémini zámuza aleneive. Lá onoinazo, heleneikutí alémo atiginá imó gelekave loko anoza letoko limóma

* 11:17: Apí 22:1-14 * 11:18: Apí 21:12

neve. ²⁰ * Itó Isaká eza gele alévolé oakeve loko alika utó iti netalímini gakó nene Zakoponi itó Esauni lo kimike nónohá zeketamó. ²¹ * Zakopó nene Ómasimú gele alévolé oaká ve minoakeve loko hilinogo noiike Zoseheni gipala lositá nónohá nozeketake, hánusatunú hize gikitoake ote minake Ómasi gupá ze ameko agepoka limole. ²² * Zosehé eza gele alévolé ve minoakeve loko hiliti gamena alitokago, Isilae vegená miniki Izipi mikasi ahuliki vitakumú geleake ezáa helisamú goí oko lo hukoko nene vinigi niiki není helisagi aliki vilo loko lo kimimó neve.

²³ * Itó Mosé utó okago, izolahiko amelahiko nene Ómasimú gili alévolé iaká aleve minikasikeve liki izegipáinimú izegipate lamaná netá neve liki ánigi kumu hilikasigo, agulizaki ve Palaoni gakokumú kelegesá legemigo ikani losive makole novigo alími halá gesimó. ²⁴ * Itó Mosé napa oake Ómasimú gele alévolé o minake, Palaoni moholámini gipalave liki litanigi ago óe loko gele ahulamó. ²⁵ Eza golesa netalímini lagaváa mino hána oko minamoakalímini nenemú giligo lemekago, Ómasímini vegenala zuha kezagi miluma netalímini agikagú niago, kezagi miní ameko gilitove loko mino etó imó. ²⁶ Lá oake, eza minoko Palaoni helisa henoni ale lá ooko Izipi mikasigutí moni henokanoni itó netá matá minumuni mukí alitikumú giligo, ha netá loló okago, Ómasímo gologí oletative loko

* **11:20:** Apí 27:27-29,39-40

* **11:21:** Apí 47:31-48:20

* **11:22:** Apí 50:24-25; Gá 13:19

* **11:23:** Gá 1:22, 2:2

* **11:24:**

Gá 2:10-12

lo mololeta vemule loko miluma gilimoláa minatove loko nenemú giligo gihiláa loló imó. Eza minomo noitike okulumakú nenémini meinaváa alitove loko lá imó neve. ²⁷ * Itó Mosé eza gele alévolé oakeve loko Izipi mikasi ahulamó nene agulizaki ve Palaoni izapaló molakumú nene ahelele vizimó negopa, Ómasi ánígamoakalímini aí agómulatunú ánígamó gelekago, alévolé oko minake lá imó. ²⁸ * Mosé eza gele alévolé imómake loko lokago, sipsip iza apilivi givi iake, vauna aleaká ageló nenémo Isilae vegenalitini ganá gipáini nene asenini zeketative loko golaníatunú numuni gateni zaló hilitamó.

²⁹ * Itó Isilae vegená keza Ómasimú gili alévolé iakeve liki age nagamí agulizá golohá nagamikú likiki vamó nene nagamí nene mino ezega emega okago gunahá mikasiló vamó. Itó Izipi ami ve keza nene ámina oko vitune liki nivago, age nagamilímo kelémo sumizá namó. ³⁰ * Itó Isilae vegená keza gili alévolé a vegená minikakeve liki Zeliko numutó nene gamena 7 oko novigo vegegisa nene ali vigikago vegegisa nenémo lemeko akamó. ³¹ * Itó gapoló mokoló vená Lahapá eza Ómasimú gele alévolé itímo ve lositosa Zosuá kimiselekago vegená kemeni áníganigi guhu gapo vasimó nene numunagú kelémo molokago, Ómasímini gakó pelesa ziaká a vegená nene Ómasímo kepeleake Lahapani nene aseva zetamó.

* **11:27:** Gá 2:15 * **11:28:** Gá 12:21-30 * **11:29:** Gá 14:21-31

* **11:30:** Zos 6:12-21 * **11:31:** Zos 6:22,25, 2:1-21

32 * Lá ikamóza, gakó lugáa nanave loko lo asú itove. Giteoná itó Palaká itó Samisoní Zepitá Tevití Samuelé itó Ómasímini agepagutí gakó liaká ve keí gakó lo asú oko linogo nelina, loloko novugo hána iline. 33 * Keza Ómasimú gili alévolé a vegená mukí minikakeve liki lugáate vegená mukí nene lova ali kemeke kivilegemó, itó Isilae vegenatokagi hetoka vegenatokagi gizapa ikitiki kagata aleaká hoza aliki kilími hehe lamó, itó Ómasímo netá lehizeketatove loko lo moloketa netalímini gihiláa alemó. Itó lugáate laezoni akohú galatini kegepaló alego, 34 * lugáate ló gulumámini agénahuna ali geha zego, lugáate lova amupiló nitekegi lá amóza, gosohá minamó. Keé amatite goha nene amuza milamó. Itó lugáate lovagú amuza milake mikasi lugalokatí gala venini kipilivi gizivi amó. 35 * Vená lugáate Ómasimú gili alévolé amómave loko Ómasímo izegipáini hilinakutí kelémo oteake goha izóikitoka kelémo gímizimó. Itó helegaloka Ómasimú gili alévolé ina vegená lugáa nogosani kepeleke gopoguni milikitamó nene monó ahulikiko aselini zeleketatupe liki li kimikago alikaloka lamaná oakakú goha otinogo une liki giliake, gili ha iake helemó. 36 * Ómasimú gili alévolé a vegená lugáa giza nikitake gopoguka likitake segi nogosanitunú kepelemó. Itó lugáa keza kigisa kigizató seni nagá aliake nagá numukú ahulikitamó. 37 * Ve-

* **11:32:** Gon 6:11–8:32, 4:6–5:31, 13:2–16:31, 11:1–12:7; 1 Sam 16:1; 1 Kug 2:11; 1 Sam 1:1–25:1 * **11:33:** Tan 6:1–27 * **11:34:** Tan 3:1–30 * **11:35:** 1 Kug 17:17–24; 2 Kug 4:25–37 * **11:36:** 1 Kug 22:26–27; 2 Iki 18:25–26; Zel 20:2, 37:15, 38:6 * **11:37:** 2 Iki 24:21

gená lugáa gehanitunú kipili helemó, itó lugáa nene kugupenini ziki gitegemó. Itó lugáa nene sopolotunú kipili helemó. Lugáa keza Ómasimú gili alévolé amómave liki kimisili ahulikago, keza mikasi gomopalaló itó agokaú gutá iki minake, mei tutuhunauka itó geha mulikú akiki mihina iki minamó. Lá iki minake gineganéini nomigo sipsip iza meme izatini galupaváa ali luhiake, gaúnámini amupiló minake, megusa izegipa lilí iki milumámini amupiló minamó. ³⁸ Nenéminate gevená lugáa keza nanáinilotí mikasiuka apiziki minikago hehe laline.

³⁹ Nenémináa keza mukitoka gili alévolé akumú Ómasímo áinigago lamaná imó. Lá okago, gopa nene netá lehizeketatove loko lo moloketa netalímini gihila nene kogómulagi mina gamenaló ma ali utó milamamó. ⁴⁰ Nenémini mogona lá oko neve: Ómasi eza lelitoka netá ite minamoláa mololetanogo gelekago minamó nenemú keza goí iki ámina netá alemamó. Aliká nene lezagi vo milisegeko minatuni netá nene ali utó itave loko Ómasímo moloketonoimóma neve.

12

Guivahanímo lagavutó zeaká noive

¹ Ómasimú gele alévolé oakalímini mogona li utó a vegená mukilite zohitó mulusi napa nenéminiki miniake lilími vigikamó nenazo, nenemú lesi-iaká nia vegenalite ololu liaká nia mogonamú gele mininake gena lepeleaká netá nene gololohá oko ale ahulatunize. Itó lihimá netalímini nagá

likimó nenegi guluhoko ale ahulatunize. Lá ok-
inake gapo lelepizimó nenelokó goselé aminake
ololu lokogó vitunize. ² Láa noinake gele alévolé
oakatemú ale goí moloaká itó nenémini gihiláa
ale utó moloaká ve Izesú nene makimáminoko
logómulaloka noiko aitoka ánigo zage loko ololu
litune. Eza agoliza nene utó o amitive loko lonoitó
zohota zaló heleakalímini avoza napámini amupiló
itikumú giligo ha netá loló okago, miluma gilike
hilimó. Lá oake, Ómasímini gonanalivagi siató
agizani lamagaloka iteake mitó noive.

³ Golesa netá itó hokolizá nene Izesuni lilí
itamó nene gele ahuloake, legesó oko minamó.
Lekeza aikumú nigiliki goselé amilo. Likigikatini
golosasa gekatize. ⁴ Lekeza golesa netakumú gim-
ilikú moloaká netalímo lekelémo akanogo noigo
amuza miliki lova ali namego lukugupelini api-
likago golani velesá amive. ⁵ * Itó Ómasímo leke-
likumú izegipáneve lolikimiake luhusatini ale kii
loleketake, gakó makó lo likimimó nene lakagatí
mologahe, olo. Gakó láa loko limó neve:

⁶ Guivahanímo agika kemeaká noi vegená muk-
itoka kagavutó zeko kelémo hehe loaká
noive.

Itó aí izegipala lamaná kelémo molamó muk-
itoka nogosani kemeko kelémo hehe loaká
noinazo,

nenemú gipáne geza Ómasímo gelémo hehe lanogo
gagavutó nozikoma, nenemú gelekako
lememino.

Itó golesa netakamú nogosani gemekikoma,
gigika golosasa gemino.

* 12:5: Hio 5:17; Ano 3:11-12

⁷ Guivahanímo lakagavutó zekikoma, goselé amiki alévolé iki minalo. Ve makolímohe makolímohe gipala apeleko alémo hee lamitihe. Lá oko nomive. Kelémo hee loaká nene vegená mukilite lá iaká nianazo, Ómasímo ánígokago aí mohola gipala lilí ikago, lekelémo hehe linogo nenémini olikimiaká noive. ⁸ Itó Ómasímo izegipala mukitó kelémo hee loaká noinazo, lekeza nene lá oleketamiko minatamó nene, mohola gipala gihila lilí iki minaminigave. Nene gapoló izegipave loko loleketanogo ive. ⁹ Itó makó litoze. Mikasiuka ametege keza nene lagavutó zikago, leza géneka lamoko kelémo napa uháma nenazo, ligikámini ametehini agahaisiuka lemeko minokuko etanogo ive. Lá okinake mino lamanatoka moloko minanogo une. ¹⁰ Ametege kezáini kagata geletó nene melekeni gamena luguhá oko novigo lagavutó ziki lilími hehe liki miniaká amóza, Ómasi áisi nene netá gihiláa utó o limitive loko itó ezáa apazá keké vizeko nomina mogona izá miliki alitave loko lá olimiaká noive. ¹¹ Lagavutó zeko lelémo hehe loaká netá utó okagoma, ganatili gelekuko laga netá negopa, milumavagi loló oaká noive. Itó alikaloka nene hehe loakakú minoaká nounimó nenémini gihiláa nene huhu lelitoka utó inogo ive.

Ómasímini nasahilí ánihi ahulikatave loko kagata alimó

¹²* Nenemú lekelisi likigika gopa o vimó likigisa likigizani akatamó lilí níikima migelelé amiki alévolé ilo. ¹³* Monolímini gapogú vinigi níiki

* **12:12:** Isa 35:3 * **12:13:** Ano 4:26

kigisa gepili mina vegená makó monéna golesa i asú ikataze. Goha monokú migelelé amitave liki lekeza Ómasímini gapoló nene ali hehe liki mihina ilo.

¹⁴ Lekeza mukí vegenaki hulu oko minatune liki amuza milalo. Kigika golotuva lovimó nenete miniki Guivahani ánígamitamó nenazo, likigik-agú gizopa lo miniko minatakumú amuza milalo.

¹⁵ Lekelitokatí ve makó Ómasímini nasahilikutí vелеhé limikataze, gizapa iki minalo. Lá niiki holutikú gohege golesa makolímó sisiva isekoko loko loaká noimó nenéminoko likigikámini ekesalámó napa okiko, vegená mukilitini kigika gopa okatinaze, gizapa ikitiki minalo. ¹⁶ * Lá niiki lekelitokatí makolímóhe makolímóhe mokoló ve keza mini etó iki minamake miniaká amó nenéminoko Esauni gapoló vokatize. Esaú eza nene hamokó nosánetakumule loko ká emane alikaloka utó otati helisa netá nene ahulamóma neve. ¹⁷ * Lekeza aí mogona mota gilinave. Eza alika amelahitokatí lusa alitove lokago amelaho óe lokago, netá matá imó nene nana oko haha itive loko geleake, ive nama oloko viha viha voko avisa lamóma neve.

¹⁸ * Lekeza Isilae vegená alemó nenéminiki Sinai agoka ali giliaká avotigilaló amave. Ló gulumagú ma vi hiamamóma neve. Itó límusi sipisi hitakú itó límugusi ze minakú itó ohuhú nalikú nenémini agikagú ma vi hiamamóma neve. ¹⁹ Lekeza Sinai agokaloka pikuli napa zimó itó Ómasímini anó lupa napa ma gelemamóma neve. Gelemoláate nene

* **12:16:** Apí 25:29-34 * **12:17:** Apí 27:30-40 * **12:18:** Gá 19:16-22, 20:18-21; Gapo 4:11-12, 5:22-27

gakó makoki gelemitune liake negénegé iki minamóma neve. ²⁰ * Gakó láa loko lo molamóma nene gilikago kehelele vizimó: Vegená makó keza agokaló lisí gilikikoma, lekeza gehanitunú kipili hilitaze. Itó izamuki ámináminiki itataze. ²¹ * Ámina golivagi netá utó okago, Mosé nene ánigoake, neza nenemú nelegesá legekago luvaluvo zekuve loko limó. ²² Lekeza agoka nenémináaló negopa, lekeza Zaion agokaú alévolé oko minoaká Ómasímini numuni apá Zelusale apakitana oko mina apá okulumakú netoka anitikave. Lá niake, ageló gatoko gato asú amoakalímini niató, ²³ itó aí izegipala zuha gihila kugulizáini okulumakú gizo molamó keza kogoliza viziki ali nupa iki minató vi anitikave. Lá niake, vegenala mukitoka lihimatemú gona mololetati ve Ómasi noító imi anitikave. Itó hehe liki minake hele vegená kigikagú lo vihelé minoakatoka kelémo mola vegenalitini kemeta-meni niatoka miní amikamóma neve. ²⁴ * Itó lo múnahéaká gakó gosohá ale utó mololeta ve Izesutoka vi anitikave. Itó Epoloni golanímo nene uvolaho apele hili lihimamú apasative loko mikasiukatí limó nenelokopa, Izesú ezáa golani hepa hepa imó nenémo aleko iteko netá gihilamú sele loaká noimó neneló vi anitikave.

²⁵ Lekeza gakó lo lekemeaká noi ve Ómasímini gakola gili ahulikatanaze, gizapa iki minalo. Gozapá Mosé nene mikasiuka minake gakó makó kagata aseva aleko lo kemekago, gakó hutuváave liki ahula vegenatoka netá golivagi utó o kimimóma neve. Lá okanazo, itína nene

* 12:20: Gá 19:12-13 * 12:21: Gapo 9:19 * 12:24: Apí 4:10

okulumakú minake ehe loko lo nolimi ve nene lemegeša amitunimó nene áminaló nogosani lemémiko ha minatupe. ²⁶ Gozapá Sinai agokaló gakó noligo mikasi mómoká imó. Lá imóza, gakoláa makó itína logómulaló lá oko lo mololimikave: Neza minoko mikasi nene goha alémo mómoká it imóza, lá noinake okulumaki nene alémo mómoká inogo uve loko limó. ²⁷ Goha nene alémo mómoká inogo uve loko limó nenemú netá matá mukí ale utó molamó nene ale mómoká okoko ale tolova itove loko geleake limóma neve. Lá itimó nene alévolé oko minoaká netá mómoká amiti netá nene utó okoko minoloko voko minative loko lá inogo ive. ²⁸ Nenemú leza alévolé netá makó mómoká amitimó minoloko voko minoaká netá nene ale lá itunikumú Ómasi agepoka linake lehelele viziko gupá ze ameko eza gele lamaná iti netá aleko monola loko minatune. ²⁹ * Nene nanamú negopa. Ómasile eza lotunú gizo lúnoaká ve noinazo.

13

Oko moloko nouko Ómasímo ángo lamaná iti gakó

¹ Monokú agunala uvolaho likigika eza amigo eza amigo iaká niamó nene lekelitoka lemémino. ² * Lugáate keza veno vegená kilími milanigi vegená kelémo nomulupe liki ageló nene kilími mili-namóma nenazo, veno vegená numuteuka kelémo molatune likima goselekaselé amilo. ³ Likigive lakagave monokumule liki nagá numukú kilími

* 12:29: Gapo 4:24 * 13:2: Apí 18:1-8, 19:1-3

milamolamú giliko lekezagi likilími milinamó gili-
liko kilími vatí ilo. Lá níiki lezagi hamó lugu-
pegi noune liki giliiki kilími golesa palasa ik-
itago nia vegenalite miluma giliaká nia netá nene
lukumupiló itino. ⁴ Mokoló itó ve vená huki
ezega emega iaká nia vegená keza Ómasímo lihimá
kiminogo inazo, vego venako minoaká sunimú gi-
likiko netá gihila loló ino, itó ve aleve suni ali gopa
amilo. ⁵ * Likigikatini nene moni henokanoniló
vamino. Nénisi nene ahulogetaminogo uve, itó
viselegetaminogo uve loko Guivahanímo lonoimó
nenazo, netatini ali minakumú mukahá makahá
amiki vitagá nouni netá ale utó oletanogo ive
liki hulu ikigó minalo. ⁶ * Nenemú leza amuza
alekinake monó gotolaú ve makolímo gizonoi gakó
makó láa loko litunize:

Guivahani eza nelémo vatí oaká ve noinazo,
neza netá nemú manamú nelegesá
legeminogo ive.

Vegenalite nana netá golesa alinitatakumú ne-
helele vizitive.

⁷ Monó gizapa velini Ómasímini gakó li likimiaká
a vemú giliki minalo. Lá níiki monolímini
gapovaló nivake helemoláatini kigizaka ánigi
zagi miniki keitoka kémegetiki niviki gili alévolé
iakatinigi ali minalo. ⁸ Izesu Kilistó eza goí
oko minamó itó itínagi noimó áminámini okogó
mino lúaló moloko minanogo ive. ⁹ Lá onoinazo,
haitopaitó gosohá monó li nilikimikoma gelemilo.
Ómasímini nasahilí nenémo likigikatini ale alévolé
olikimikiko nene lamaná inogo ive. Netá

* **13:5:** Gapo 31:6,8; Zos 1:5 * **13:6:** Age 118:6

noakalímini itó namoakalíminimú li hukina gakó nenémo ma lelémo vatí aminogo ive. Nene gakó ámegetiki vamó nenete gihila ma ali utó milinamamóma neve.

¹⁰ Izesú nohiligo ezáa agupe nene lelí guguni gizoaká netá loló okamó nenazo, Zuta vetini apazá seli numukú Ómasi gelekelé imiaká nia vegenalite ligikámini nosánetá gihila natave loko gele kemenamive. ¹¹ * Lekeza mota gilinave. Guguni giziaká vetini ve napa nenémo pulumaká izahe meme izahe apeleko gé loake, golani nene vegenalitini lihimáikumú guguni gizatove loko Ómasímini apazá zavusavegú aleko itekago gahaváa nene númaseloka aliki limiki ló gizi ahuliaká niave. ¹² Itó Izesú eza ámina oko ezáa golanitunú vegená ligika ale guluvitoletatove loko Zelusale numuni númaseloka apilikago hilimó. ¹³ Nenemú leza ámina oko avotegini gakó gele alekuko Ómasímo lugutó vizitihe liki liaká nia vegená ahulokimikinake aitoka lemeko aí amupiló avoza hili netá ámina oko lumupiló itekiko gihi-tunize. ¹⁴ Lá noinake alévolé apá makó Zelusalegitana imaneloka lelitoka minamize, hanuva minoko utó itimoláa nenemú nene ligikámo ageva oaká noive loko nogilinake lá itunize. ¹⁵ Nenemú legepatunú lituni netalímo Izesuni agulizá ale oteko noiko Ómasi miní ameko agepoka loko minatunimó nenémo lelí guguni gizo ameaká netate loló okiko Izesuni amekuko, Ómasi alapizitive. ¹⁶ Ómasi eza nasahiliki netá itó netá lamaná izá moloko vegená kimituni netakumú gelekago gu-

* 13:11: Liv 16:27

guni gizo ameaká netá gihiláa loló oaká noinazo, ámina netá alitune liki lakagata gili minalo.

¹⁷ Monokú kugulizaki velini nene lekemetame-niló gizapa ilikitiki ali hehe liki miniaká nianazo, keí gakó gili aliiki keí kamatoka limiki minalo. Keza nene hozaninímini mogonamú alika game-naló nene li utó milanigave. Lekeza hokolizá atímo miluma nigiliki ámina hoza alitamó nene lekelémo vatí iti netá lekelitoka utó amitimó ne-nazo, nenemú hozaváini kigika lamanatotí alitave liki gelekelé ikitiki némini manámini ikitalo.

¹⁸ Neza etó okogó oko moloko itove loko amuza moloaká noumó nenazo, nigikagú lihma netikumú vitagá oaká nouve. Lá noumómave loko nenikumú Ómasiloka liki minalo. ¹⁹ Guivahanímo není gapo hize lí noi netá ahulooko nelémo atiginá okiko lekelitoka litá oko vitove loko numuna loakatunú nilími vatí ilo loko gala vizeko lo nolukumuve.

Ómasi agepoka limó

²⁰ Hulu amelaho Ómasi eza Guivahanite Izesú ezáa golanitunú alévolé oko minoakalímini lo múnahéaká gakó ale alévolé imómave loko sip-sip izaló gizapa ve napa loló i ve hilikutí alémo atiginá o lemeka ve ²¹ Ómasi áisi netá lamaná haitopaitolímini lehizeleketoko lekelémo vávani okiko eza lititoka molatitoka gili alitave loko noluve. Lá niiko, ezáa gelekiko lamaná iti netá nene Izesu Kilistoni zámuzatunú likigikagú ale utó ino. Aí luhuva gegemá okiko agepoka loloko iteva iteva oko alévolé oko minino. Lamaná.

Vegená gekéini loketamó

²² Nigive nagavese, neza gakó hána gizo lekemenamumó nenazo, lakagata aleko luhusatini ale alévolé iti gakó imane lo lukumumó nene lakagata gili hee liki gili minalo. ²³ Itó lo likimitoze, gililo. Ligiveteho Timotini mota kalapusigutí guluhimikanazo, eza litá oko okikoma, alémoko vinake ánigoleketatíve liki gililo. ²⁴ Monó gizapa velini itó Ómasímini vegená lugáa mukí nene gekéini noloketuze, li kimilo. Italia mikasiukatí likigivetike imaneló niamolate gekelini nililikitago lo nolukumuve. ²⁵ Ómasímini nasahilí nenémo lekelitoka minoloko voko minino. Lamaná.

Monoq Gotola Gosohaq
The New Testament in the Alekano (Gahuku)
Language of Papua New Guinea
Nupela Testamen long tokples Alekano (Gahuku) long
Niugini

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

44bc4c3c-532b-5251-95bd-2c3cfdce78ba